

四庫全書

史部

欽定四庫全書

平定準噶爾方略正編卷六十五

乾隆二十三年十一月丁未

副都統愛隆阿疏奏靖逆將軍納穆扎爾等信
息

愛隆阿奏言臣隨將軍兆惠於十月初五日至
葉爾羌初十日渡河令臣領兵五百名又侍衛
奎瑪岱兵三百名防範喀什噶爾來援賊衆併

巡查臺站候將軍納穆扎爾叅贊大臣三泰等
到時派兵隨至大營納穆扎爾三泰於十三日
至臣營臣派騎兵二百五十名步兵二百名護
送納穆扎爾等但帶騎兵於申刻起程期以黎
明趨至大營將臣遣回十四日五鼓時吉林兵
津保住來告云將軍等聞鎗礮聲遣奎瑪岱拏
獲回人詢知賊營在近即擬衝擊臣即領步兵
渡河策應又據署驍騎校黑柱來告云將軍等

於黎明時望見回人三處營盤正遣哨探問賊
衆三千餘布陣來攻將軍等即接戰人少馬乏
不能衝突不知信息如何臣正在詢問間將軍
兆惠遣人告知被圍之信又據隨將軍納穆扎
爾等之賽里木回人等來告云我兵遇賊力戰
賊衆四面合圍侍衛奎瑪岱先殞將軍納穆扎
爾矢盡叅贊大臣三泰墜馬徒步接戰僅餘二
矢俱中賊鎗陣亡傳聞此次回賊係波羅泥都

為首霍集占守城等語臣於十五日聞知兩處
信息若領兵應援恐無濟於事惟遵兆惠令收
集臺站向阿克蘇與舒赫德商議整兵再進兆
惠處有兵三千餘宰食馬駝可至正月臣自臺
站前來與副將定柱遇賊勦殺於二十七日至
阿克蘇將所帶綠旗兵遣往烏什防守至臣未
能應援將軍罪不可逭懇請正法示衆奏入得
旨愛隆阿遵兆惠行文收集臺站勦殺賊衆尚屬効

力已加恩交部議敘其送信回人等著舒赫德酌量賞給陣亡兵丁查明送部議卹俱已降諭旨命優卹靖逆將軍納穆扎爾等

上諭大學士曰據愛隆阿奏稱靖逆將軍納穆扎爾叅贊大臣三泰及巴圖魯侍衛奎瑪岱於十月十三日領兵二百餘名前赴將軍兆惠大營至次日有隨營兵丁等告稱十三日夜四鼓時納穆扎爾等遇逆賊三千餘人倉猝接戰納穆扎爾三泰奎

瑪岱俱已陣亡等語伊等奉命前赴軍營輕裝進
發所領兵丁僅二百餘人設令先到大營固可會
同進剿即後至一二日亦與愛隆阿一同駐守乃
星夜趨行之時適遇賊衆猖獗伊等並不肯於中
途退避自全惟知直前衝擊以致授命捐軀忠毅
之氣深可嘉憫納穆扎爾著贈公爵三泰著贈子
爵俱世襲罔替其侍衛奎瑪岱著照奇撤布之例
賞給世職應得卹典仍著該部察例具奏陣亡兵

丁人等並著查明分別從優賞卹

命叅贊大臣舒赫德等補授工部尚書等缺

上諭大學士曰工部尚書鑲紅旗滿洲都統納穆扎爾員缺著舒赫德補授所遺吏部侍郎員缺著阿里衮補授戶部侍郎三泰員缺著明瑞補授正紅旗漢軍副都統著鄂弼陞補永貴尚未來京其刑部侍郎事務著鄂弼暫行署理

戊申

諭大學士管陝甘總督黃廷桂酌遣屯田兵丁備勦

事宜

上諭軍機大臣曰據黃廷桂奏稱來年添派屯田兵丁一萬三千餘名計陸續解送馬匹牲隻除倒斃外所存尚不敷用擬於臺站車騾及採買驢頭各營孳生兒騾馬匹內各派二千解送闢展以備永貴撥用等語具見實心經畫從前添派屯田原以辦理回部今年可告成功此時尚需策應軍營整

師再進則屯田自可稍緩朕意於此項兵丁內選
派四五千名預備進勦伊等雖係步兵而追隨騎
兵之後聲威益壯至所備馬匹牲隻擇水草佳處
牧放或供輓運或備乘騎於軍務有濟而辦理更
覺裕如且來年必有應屯田之處即再派一二千
亦可所派兵丁雖或先已賞給俟明年辦完回部
後尚需屯種亦無庸追繳至內地採買騾驢恐民
間不無貽累所派兵丁既不及原額自可暫停採

買將此傳諭黃廷桂定長等會商定議辦理一面具奏併傳諭兆惠富德舒赫德等應作何調撥酌議奏聞

命分別獎飭領隊侍衛等

上諭軍機大臣曰據清馥奏稱領隊侍衛豐訥亨等因前奉緩行以息馬力之諭今又准叅贊大臣等催令速行咨請指示隨行文令其酌量馬力以速為要等語所見甚是軍營情形緩急不同行文日

期亦有先後何必拘泥前旨行走處尚如此觀望
臨陣決機安能奮勉前進可謂不曉事體著傳旨
嚴行申飭適據額訥慎塔爾海烏爾圖納遜等奏
稱遇舒赫德所遣五十保促令趲行雖奉旨搜捕
嗎哈沁自以策應軍營為急即領兵速進等語似
此方合事機著紀功候賞五十保行走甚好著加
恩授為三等侍衛

授故叅贊大臣三泰之兄祥泰為散秩大臣

上諭軍機大臣曰三泰遇賊陣亡伊家現無大員著
加恩授伊兄祥泰為散秩大臣

乙酉

諭辦理屯田副都統職銜定長等巡查臺站

上諭軍機大臣曰前命侍衛額訥慎等巡查臺站今
聞信速赴軍營時屆冬寒西北大山一帶嗎哈沁
勢難藏匿或潛至臺站附近乘間盜竊馬匹亦未
可定今屯田兵丁農務有暇著傳諭定長等選派

二三百名巡查搜捕彼處若有馬匹則多派騎兵
更安豆斌在軍營尚無要務著即照定長所領之
數選派兵丁前赴魯克察克開展庫車一帶往來
巡緝以清臺路

庚戌

申諭定邊右副將軍富德等速赴軍營

上諭軍機大臣曰據富德奏稱十一月初十日遇舒
赫德所遣藍翎侍衛扎勒都告知軍營情形即於

現在烏魯木齊兵丁一千三百名內選索倫兵三百名吉林察哈爾綠旗兵二百名令副都統鄂博什侍衛瑪璫額爾登額老格等為前隊又派往巴祿處之索倫兵五百名現距烏魯木齊兩站即親行帶領起程餘兵令瑚爾起帶往伊拉里克托克三等處支領馬匹軍器等語所奏甚合機宜即瑚爾起之兵不能趲赴而預備來年再舉亦甚有益惟宜加意奮勉前進仍令瑚爾起曉示兵丁以伊

等効力年久本欲撤回事出倉猝暫行留用一切
賞給均照初次之例沿途酌量馬力速赴阿克蘇
會同舒赫德計議進剿

辛亥

恩賞阿克蘇回城頭目等翎頂緞足

上諭軍機大臣曰舒赫德奏稱管理阿克蘇之阿璉
阿卜都噶頗爾副總管頗拉特巴巴克於公事各
知奮勉阿爾雜默特率先歸順又督辦隘口卡倫

事務俱屬効力等語伊等甫經降附即感激報効殊屬可嘉著加恩賞給阿琿阿卜都噶頗爾副總管頗拉特巴巴克孔雀翎四品帽頂阿爾雜默特藍翎仍酌量賞給緞疋

諭叅贊大臣巴祿等前赴兆惠軍營

上諭軍機大臣曰據巴祿奏稱前聞阿巴噶斯哈丹餘賊藏匿齋爾等處隨經親往搜查並無踪跡今遵旨回抵烏魯木齊帶領新派兵丁前往等語可

傳諭巴祿此時因將軍兆惠被圍催各隊援兵速
進所諭帶領之索倫兵已經停止而富德亦奏請
就近帶往軍營阿巴噶斯哈丹餘賊即入俄羅斯
亦無闊緊要若尚在藏匿將來自可勦除且又非
哈薩克錫喇可比巴祿即由進兵道路前赴兆惠
軍營又

諭曰前因招降安集延納木干二城回人約來春到
伊犁投見曾降旨留兵一百名駐候續巴祿因格

登山立碑紀功請照前數派兵令主事富魁駐劄料理併守候回人但駐兵必須安設臺站殊為勞費若現在立碑事竣回人尚無信息即當撤回前赴兆惠軍營可傳諭定長酌量辦理

恩賞哈密貝子玉素富貝勒品級

上諭軍機大臣曰舒赫德奏稱貝子玉素富調取布魯特之特穆爾占隨侍衛布占泰往布魯特發兵攻勒喀什噶爾今特穆爾占遣其族子烏魯特特

穆爾等前來玉素富辦給馬匹又賞緞足茶葉養
贍家口伊等欣感起程等語玉素富辦事軍營駐
守烏什俱能悉心奮勉甚屬可嘉著加恩給與貝
勒品級

壬子

諭定邊右副將軍富德速往策應軍營

上諭軍機大臣曰富德奏稱聞兆惠被圍之信即領
兵量力馬步兼行約十二月二十內外可至阿克

蘇計兵五千有奇惟急需馬駝軍器已行文各處辦事大臣務期辦馬萬餘匹駝數千隻方足敷用等語富德存心忠實甚屬可嘉以理揆之必蒙

上天福佑早告功成至豫備馬駝一事昨阿里衮親送馬三千匹駝七百隻黃廷桂又送馬三千匹合之各隊兵丁乘騎者不下萬餘若再急為解送則路遠候寒徒致疲斃此時舒赫德諒已前進可傳諭富德惟在速往應援內外夾攻賊衆必潰我師暫

回阿克蘇休息來年五月整兵再進計內地牧養之馬於二月起程四月可到且正當麥熟軍食有資蕩平回部在此一舉富德其加意奮勉與將軍大臣等會商辦理

十二月癸丑朔

諭察哈爾總管敏珠爾等巡查臺站

上諭軍機大臣曰據敏珠爾等奏稱兵至托克三奉旨查拏偷盜特伯勒古臺站馬匹之賊已速行至

哈喇沙爾向海都河等處搜捕等語可傳諭敏珠爾此時軍營若行文調取自當速往應援如未經起程則臺站亦屬緊要伊所領兵二百名仍往來巡查臺站以清道路

諭陝西巡撫鍾音辦送西安駐防官兵事宜

上諭軍機大臣曰鍾音所奏辦送官兵一摺內稱於西安雇用長驪徑送出口較設站遞送更為便捷等語昨據胡寶瑤覆奏河南現辦雇驪六千餘頭

由西安送至蘭州再令陝西接換直送出口所辦甚屬妥協今蘭州以東既用河南所辦則陝西力更寬餘徑可先期趨赴蘭州接替直抵哈密彼此俱屬便捷其一切沿途委員加意照料之處均遵照前旨行

甲寅

命封大學士管陝甘總督黃廷桂為三等伯

上諭大學士曰大學士兼管陝甘總督黃廷桂忠誠

素著老成練達西陲用兵以來雖未身履行陣而
籌辦一切軍需動協機宜多有朕所降諭旨尚未
到肅而適相脗合旋即奏到與朕所規畫不約而
同者數年以來若非黃廷桂體國奉公不遺餘力
安得精詳妥協若此而毫不累民內地若無事此
其功為尤大朕心實深倚毗宜晉崇階用彰勞績
黃廷桂著由騎都尉晉封為三等伯並加賞紅寶
石帽頂四團龍補服以示優異又

諭曰黃廷桂晉封伯爵前授騎都尉例應註銷但此職現賞給伊子著加恩仍准其本身承襲

命吏部侍郎阿里衮補授兵部尚書正紅旗蒙古都統

乙卯

叅贊大臣舒赫德疏奏和闐等城回衆歸誠

舒赫德奏言十一月初五日據阿克蘇之阿奇木伯克等領散秩大臣伯克鄂對處差來伊家

送信之回人投見據稱伯克鄂對同侍衛齊凌
扎卜噶布舒前往招撫和闐時途間捉生詢問
隨傳檄和闐頭目云大兵已至我等同

天朝侍衛前來招撫爾等須作速投誠否則大兵一
到將爾等盡行勦滅和闐頭目等聞信遂將霍
集占所遣之四五十人驅逐逃走於伯克鄂對
等未到三日之前即率衆出迎鄂對等於九月
二十左右入城於是和闐所屬之哈喇哈什玉

隴哈什塔克齊爾拉克勒底雅等城伯克等聞風俱各投誠鄂對等駐城二十五日其各城頭目二十餘人及隨從人等約於十月十七八日同侍衛等由和闐起程前往葉爾羌投見將軍等語臣詢問回人等云我侍衛同伯克鄂對各城頭目皆往見將軍曾否派委信實之人守城和闐至葉爾羌約行幾日亦有前鋒哨探否據稱城守俱有信實之人鄂對等約行七八日可

至軍營仍於沿途探聽大兵信息又問爾等曾
遇見由阿克蘇先差之回人三名續差之侍衛
一員兵二十名否據稱由阿克蘇至和闐有兩
三處路徑我等雖聞有差員經過並未相遇等
語臣伏思伯克鄂對等招撫和闐六城往見將
軍時雖未得大兵信息但鄂對人頗歷練且有
二侍衛與索倫兵在途間留心探聽如得大兵
信息料伊等必能籌辦鎮撫各城再以鄂對等

起程之日計算於途間得信轉回時正可與臣等所差之回人相值一有信息即行具奏又阿克蘇之阿琿阿卜都噶頗爾副總管頗拉特巴巴克及伯克鄂對之妻因駐劄兵丁行裝俱留開展情願辦送羊皮襖二百件布三百疋添備冬衣以表誠悃臣等加以撫慰擬酌量賞給銀兩緞足以示獎勵奏入

上諭軍機大臣曰伯克鄂對與侍衛齊凌扎卜等招

降和闐等城前往軍營投見將軍兆惠殊屬可嘉
著加恩授鄂對為內大臣其各城伯克應授散秩
大臣及三品四品總管者候兆惠查明奏請補授
仍俱賞戴孔雀翎鄂對遣來阿克蘇送信及舒赫
德所遣偵探信息之回人等俱著酌量賞給銀兩
其阿克蘇之阿琿及總管等願助兵丁衣服誠悃
可嘉著賞緞各四端伊等所助冬衣俱計值賞給
此時舒赫德應已領兵起程軍前効力人等宜加

鼓勵著發孔雀翎藍翎各二十枝豫備賞賚所有
軍營信息作速奏聞

宣諭和闐等城歸附及軍前情形

上諭大學士曰據駐劄阿克蘇城尚書舒赫德奏稱
前遣散秩大臣伯克鄂對同侍衛齊凌扎卜噶布
舒等前往和闐城招撫回衆今據遣人告稱和闐
回人奉到傳檄傾心投誠即將逆賊霍集占遣往
之數十人追逐奔竄率衆遠迎其所屬之哈喇哈

什玉隴哈什塔克齊爾拉克勒底雅等五城伯克
亦俱聞信來降今鄂對等率領各城頭目赴葉爾
羌投見將軍等語初將軍兆惠勒兵前進聲威所
至如烏什阿克蘇等城相繼迎降而伯克霍集斯
復親詣軍營歸順願効前驅是賊首霍集占勢已
窮威惟逃竄於葉爾羌以圖苟延旦夕若不乘機
直入徑搗賊巢則以霍集占之奸詭狡詐焉知不
又煽惑諸城回衆今觀和闐等城奉檄傾心遣人

投見可知我兵為賊所拒不過霍集占見各城解
體不能煽惑因悉其老弱之衆以為孤注之一擲
耳則前此將軍兆惠等乘賊不備整兵疾馳亦係
應機進取勢無中止之理特以對壘時不深知地
利兼之馬力疲乏是以未能克捷並非賊勢猖獗
所致也況軍營大臣及侍衛兵丁等聞信之下無
不切齒憤恨星夜兼程前進而肅州哈密巴里坤
大臣等亦各將鎗礮軍器馬匹糧餉迅速轉運朕

心深為嘉悅觀大臣官兵如此奮勉同心協力則人心上應

天心自然默相成功殄滅賊衆以彼勢窮力蹙之逆回我兵內外夾攻俾將軍兆惠等回至阿克蘇遵朕節次指示來年整兵進勦自可集事即此次進兵如蒙

上天默佑遇可乘之機一舉成功亦未可定除伯克鄂對等皆已加恩外將此通行曉諭知之

巴圖魯侍衛濟塞布以病留巴里坤身故
授其子為恩騎尉賞銀一百兩

丙辰

諭刑部侍郎永貴等辦理糧運等事宜

上諭軍機大臣曰永貴奏稱准舒赫德咨合計官兵
一萬四千陸續運送口糧羊隻可至來年二月等
語但天寒道遠所送羊隻必多倒斃自不能盡符
原數而內地運糧駝隻計自關展至庫車正月望

後方到仍須休息月餘再行轉運又不能接濟二
月以後之糧請將運送籽種之駝再派出二千隻
作為兩隊轉運其屯田事務酌量裁減停止等語
昨據舒赫德合計兵數及阿克蘇烏什所購米糧
內地解送羊隻具奏即諭黃廷桂多為籌辦并停
止增派屯田以籽種農具車輛轉運行糧永貴尚
未聞知又如各隊新派官兵裹帶三個月口糧俟
滿日再為支給則為時又屬寬裕永貴亦未計及

故稍露畏難之意然茲事宜能停止至所奏各隊
官兵策應兆惠後稍為休息俟來年夏令再行進
取朕早降諭旨但我兵既能與兆惠會合聲威大
振霍集占等逃潰之餘若能乘勢擒勦或伊等屬
人縛獻又豈可回駐阿克蘇而坐失機會凡事惟
在乘時決策不可預存意見併傳諭舒赫德曉諭
官兵等加意撙節口糧毋致糜費

戊午

諭三等侍衛達爾黨阿等帶領派出西安駐防官兵
上諭軍機大臣曰昨命都賚前往西安挑選駐防滿
洲兵令嵩阿禮楊桑阿帶領前赴軍營伊署理將
軍事務今據嵩阿禮奏都賚各款已命劉統勲
前往查審嵩阿禮著仍留將軍之任所派官兵二
千名著達爾黨阿哈達哈分領前赴軍營

己未

恩免陝甘各營借支養馬銀兩

上諭大學士曰陝甘滿漢各營餽解馬匹自去秋至今春各項借支官銀據黃廷桂查奏計五十萬九千二百餘兩皆應行按限扣還之項朕軫念邊兵著加恩全行寬免用昭體卹勤勞至意該部即遵諭行

庚申

恩諭增給購辦喀爾喀馬駝價值

上諭軍機大臣曰將軍成衮扎布等奏稱揀選達什

達瓦之厄魯特等於四部落購辦馬駝令其送往
巴里坤等語天氣現值冬寒喀爾喀等生計亦多
貧薄若按照從前價值未免不敷可傳諭成衮扎
布等購辦馬駝加恩酌量增給價值務使伊等毫
無擾累仍將現在辦理情形具奏

辛酉

命原任布政使同德以道銜隨布政使清馥在巴里
坤辦事

賜副都統溫布圖布巴圖魯號由屯克特爾克巴圖魯號所給雲騎尉職銜准伊子等承襲

壬戌

叅贊大臣舒赫德疏奏軍營情形及駐兵和闐事宜

舒赫德奏言十一月十二日夜伯克鄂對等遣回人報稱九月二十四日招服和闐等六城十月初九日遣回人四名往軍營報知將軍據回

稱將軍領兵現與賊衆交戰不能通信二十一日又遣人往探二十七日回稱行遇賊營在大兵營外屯劄竟不能通彼此互相結寨放鎗看來大兵似被賊圍守若臺站不斷自可督兵應援我等或由和闐或由烏什務往軍營探信又克勒底雅城以外有人衆馱載陸續前來不知係何處之兵亦遣人往探等語臣問來人和闐等城情形如何據告稱六城人衆實心歸附各

圖堅守但以無馬不能出兵等語臣伏思和闐等城今雖歸附恐聞大兵被圍之信妄生疑懼應派兵防護因商之總管噶岱默特據云現在阿克蘇烏什因駐有兵丁人心頗定和闐自應照辦臣即派綠旗兵五百名令遊擊伍凌阿守備傅能帶領人給十日口糧撥馬三十匹駝三十隻整裝起程行文伯克鄂對令其妥協辦理又臣於十一月十三日閱富德咨將軍文云富

德於十月二十二日抵烏魯木齊二十四日令
努三承德前往闡展於新調四千兵內先辦送
索倫兵一千名挑選馬三千匹餘兵續行進發
等語查各隊兵丁臣於十月十八二十等日俱
已催督前進恐接富德行文或致守候遲延復
差人行催并知會富德即行前進奏入報

聞

癸亥

三等侍衛五十保以備問軍營情節來京

賞銀五十兩衣一襲

命齋賜將軍兆惠等章服馳驛前往軍營

甲子

命原任道員淑寶以道銜隨布政使清馥在巴里坤

辦事

丙寅

諭大學士管陝甘總督黃廷桂等轉運糧餉事宜

上諭軍機大臣曰黃廷桂奏稱運送來年進勦兵丁口糧現在開展有駝六千隻仍需駝四五千隻方足數用請降旨直隸山西督撫再行購辦趲赴甘肅備用等語可傳諭黃廷桂適已諭直隸總督方觀承辦駝二千隻山西巡撫塔永寧辦駝三千隻今又諭塔永寧量力再辦二三千隻隨得隨解以濟軍需矣運糧駝隻購辦不易朕意自庫車至阿克蘇若雇回人牛驢給以腳價遞相傳送又於屯

田收穫糧石內量為撥運亦可稍省轉餉之勞但
此事恐非永貴所能獨辦可傳諭舒赫德計此旨
到時伊已應援將軍等回抵阿克蘇來年不必隨
同進剿仍於阿克蘇庫車之間同永貴往來巡查
糧運勸課屯田至撥運口糧時或雇回人牲隻或
貧苦回人內有願肩糧步送者俱酌給價值但宜
視其果否情願不可勉強派累致失新附之心德
舒既辦理庫車事務併著傳諭知之

獎諭副都統巴圖濟爾噶爾等

上諭軍機大臣曰定長等奏巴圖濟爾噶爾瑚爾起於十一月二十五日領兵至伊拉克因馬駝未至兵丁等皆背負口糧軍器步行戈壁隨將現到開展駝隻趲送仍將續到馬駝速為接濟等語伊等所領官兵皆應撤回更換者昨因懇請前赴軍營已諭照初次出兵例賞給今天不候馬駝步行速進奮勉可嘉除照前旨賞給外巴圖濟爾噶爾

現任鑲黃旗蒙古副都統著加恩授伊弟恩克阿
穆爾為藍翎侍衛賞伊家銀一百兩瑚爾起著補
授正白旗蒙古副都統傳諭巴圖濟爾噶爾等曉
示官兵勉效前驅以膺恩賞

丁卯

恩授呼岱巴爾氏為內大臣并賞給効力回人等
上諭軍機大臣曰舒赫德奏稱霍集占遣阿卜都克
勒木等潛至阿克蘇令回人克伯克默特送書與

烏什之穆遜阿琿為阿克雅爾回人呢雅斯等拏
獲據阿克蘇之阿琿伯克等告稱穆遜之兄薩拉
阿琿現在葉爾羌故致書伊弟伊二子一孫俱在
烏什隨行文商之呼岱巴爾氏將薩拉之子孫圈
禁并曉示回人俟究問明白再行辦理與衆無涉
勿妄驚疑等語呼岱巴爾氏之父霍集斯効力軍
營伊復通曉事體深用嘉悅著加恩授為內大臣
賞戴孔雀翎阿克蘇之阿琿伯克及拏獲送書人

之呢雅斯等可傳諭舒赫德俱酌量賞給銀兩緞
疋再所奏賽里木回人協助馬駝自應賞給價值
庫車距彼頗近併傳諭德舒每馬給銀八兩每駝
給銀十五兩以示體卹

戊辰

諭定邊右副將軍富德一體賞給官兵

上諭軍機大臣曰富德奏稱伊所領滿洲索倫蒙古
官兵照初次出兵之例減半賞給整裝銀兩其綠

旗厄魯特等兵應請旨遵行等語綠旗厄魯特兵
丁俱在軍前効力俱著照例賞給以昭一視同仁
之意

諭大學士管陝甘總督黃廷桂等會商糧運事宜
上諭軍機大臣曰據富德奏稱領兵進發見沿途地
多戈壁魚之山險運糧騾駝多致傷損惟牛羊尚
可趕送且回人等頗有口糧牲隻若折給銀兩令
兵丁市買較為省便等語長途轉運維艱即內地

購買牛羊亦復不易從前挑選牧羣馬牛羊隻俱
在開展牧放原備屯田之用今軍需孔亟或俟草
青時趕送軍營作為口糧亦可至耕犁缺額即酌
量籽種多寡輔以人力此亦第就目前情形權其
緩急不得不然者著將富德奏摺錄寄黃廷桂吳
達善清馥定長等閱看悉心會商妥協辦理其市
買回人口糧牲畜即將哈密巴里坤開展三處備
貯銀兩酌量動撥亦傳諭富德舒赫德永貴知之

議協濟甘肅驛站事宜

軍機大臣奏言黃廷桂奏稱甘肅驛站馬匹不敷應需添補奉

旨令臣等酌議具奏查甘肅現辦軍務既需添設而內地驛站有差務簡少者自應隨時裒益臣等會同兵部酌議除直隸山西陝西等處現在馳遞軍務外其山東河南安徽江蘇浙江江西湖南湖北驛站不過沿塘備用並無緊急差務自

應查明原額量為裁減臣等按照各省驛馬之多寡通計暫行酌減者三千三百匹仍交各督撫酌量地之衝僻事之繁簡分別抽撥其山東河南所裁一千五百匹即就近解交直隸聽候撥用安徽等五省所裁一千八百匹俱不必解送但於各驛按數即行裁扣至軍務告竣應否酌補原額臣等會同兵部再行請

旨辦理奏入

上從之

平定準噶爾方略正編卷六十五

欽定四庫全書

平定準噶爾方略正編卷六十六

乾隆二十三年十二月己巳

叅贊大臣扎隆阿等疏奏擒獲烏梁海逃犯恩克

扎隆阿等奏言准郡王車木楚克扎布咨十月十七日同內大臣察達克等在吹河派兵分隊捉生詢問逃犯恩克踪跡旋獲同逃之扎巴濟

克四戶人口又獲其屬人鄂特赫錫等詢知恩
克在蘇穆勒圖十一月初九日又獲其弟哈齊
克行至蘇穆勒圖拏獲恩克之姪塞卜騰及其
家口聞恩克在伊妹塔克爾奇里克游牧其地
大山深林恐聞風逃匿令察哈爾三等侍衛額
爾德尼藍翎侍衛羅卜章署叅領薩第喀爾喀
叅領吹烏梁海章京扎瑪默勒塔勒克等官兵
黃夜步行拏獲恩克克爾奇里克及同逃人等

將恩克之妻給與察達克同逃之妻子分給兵
丁又據布延圖卡倫報稱恩克等於十二月初
一日解到住宿是夜克爾奇里克逃走等語臣
等即派兵行文拏緝其疎防之員查明議處奏

入

上諭軍機大臣曰據扎隆阿奏稱車木楚克扎布領
兵拏獲逃犯恩克等甚屬効力著加恩賞緞六端
察達克賞緞四端所有索倫察哈爾官兵著查明

交部議敘察達克所領兵丁前雖賞給口糧今既
拏獲逃犯著加恩同喀爾喀等官兵俱酌量賞給
銀兩以示鼓勵

諭辦理屯田副都統職銜定長酌給策應官兵駝隻
上諭軍機大臣曰據黃廷桂奏稱富德等前進官兵
需用駝隻俱以預備糧運之駝供應其已祿瑚爾
起等陸續進發亦在所必需若不加以撙節則次
年糧運轉致周章已行文定長等所有續到闢展

駝隻俱令牧養不得輕為派撥等語雖為來年糧運起見然策應兆惠更屬目前要務不得不權其緩急可傳諭定長等辦理各隊官兵起程若馬匹疲乏仍以駝隻接濟不可拘泥黃廷桂來文致有遲滯

諭大學士陝甘總督黃廷桂查辦軍營逃病兵丁

上諭軍機大臣曰據黃廷桂奏稱遵旨查辦雅爾哈善等所領綠旗兵丁脫逃案內其中有實係抱病

在途似與無故脫逃者不同現咨屯田大臣等將沿途逃病兵丁解訊確情定奪等語兵丁中道脫逃自應治以軍法若實因患病留後則情事迥不相同相侔豈可漫無區別乃雅爾哈善身為將軍馬得勝專司提督而於士卒之是逃是病一切付之不問亦可謂太無紀律矣且兵丁內有患病之人既不令隨時稟報又不派員照管及給與口糧以資調養甚至有流落者即此一事觀之雅爾哈善馬

得勝二人之罪可勝誅乎今事後查辦雖有除名糧冊其中詭逃為病者亦恐不免何足為據若徒紛紛質對或承辦之員不能妥協未必盡無冤抑總之罪在雅爾哈善馬得勝著黃廷桂查明兵丁逃病情由如患病屬實但革去名糧免其治罪

大學士管陝甘總督黃廷桂疏奏親驗馬匹起程日期

黃廷桂奏言臣前奏擬於本月初四日親往甘

州涼州一帶查驗馬匹今蕭州所養馬匹臣俱
飭交甘肅道輔德寧夏道勒爾謹等公同加意
飼秣初四日起程先至甘州續至涼州查驗督
率務宜及時飼秣一律臚壯臣再回肅州其續
到事件臣率同涼莊道明德洮岷道程燾俱於
途次辦理奏入報

聞

諭大學士管陝甘總督黃廷桂酌議賞給送馬官兵

上諭軍機大臣曰據同福柱奏稱黃廷桂調撥營馬二千匹至涼州餵養伊親行送往并派協領瑚柱等作九起行走等語解送馬匹之滿洲綠旗官兵沿途所需行糧有無應給官項伊等至涼州照看飼秣時應如何加恩賞給可傳諭黃廷桂查明議奏再降旨賞給以示體恤

壬申

叅贊大臣扎隆阿疏奏拏獲逃犯克爾奇里克

扎隆阿奏言臣前奏逃犯恩克親黨克爾奇里
克於解至布延圖卡倫時復行逃脫押送之索
倫獎賞藍翎喇卜坦等比即追捕十二月初五
日至烘郭爾鄂隆之源追及克爾奇里克走入
烏梁海副都統赤倫所屬馬甲根敦扎卜處因
協同拏獲臣等即嚴加鎖縛派員看守於初八
日起程解京奏入得

旨赤倫根敦扎卜及効力官兵俱著酌量賞給以示

鼓勵

癸酉

諭定邊將軍兆惠等查奏各隊効力官兵

上諭軍機大臣曰據努三等奏稱伊等於庫車等處
遇新派各隊官兵俱疾速行走計十二月初旬可
俱抵阿克蘇等語此次大臣侍衛官員兵丁同心
協力晝夜行走甚屬奮勉如此方是滿洲世僕朕
心深為軫念前諭將軍營奮勉官兵查明具奏可

再傳諭兆惠此次効力之大臣侍衛官兵等俱著
查明註冊俟功成之日定沛恩施以酬勞績

諭辦理屯田副都統品級定長豫備哈薩克貿易事

宜

上諭軍機大臣曰據定長奏哈薩克阿布賚遣伊屬
人至烏魯木齊懇求貿易并與從前將軍等遣往
哈薩克之寧古塔兵丁雅呼同來即派原任道員
成德前往經理又將阿布賚呈將軍大臣文書進

呈哈薩克既遣人前來自應准其貿易覽阿布賚
呈文則後此仍有貿易之人若果如所約亦照此
次辦理但呈文中有雅呼等兩次帶領伊等貿易
懇將軍大臣獎賞以示鼓勵等語可傳諭定長伊
貿易人等若代雅呼懇求即示以我等所辦者惟
貿易事務至保舉効力之人則不敢干預爾等俟
親見將軍時稟告若雅呼佯為不知即無庸向說
若亦私自懇請即令其來京候旨仍將伊等言語

情形具奏

甲戌

命辦理屯田按察使納世通前往阿克蘇辦事

上諭軍機大臣曰納世通奏稱舒赫德現在領兵前進辦理阿克蘇事務惟永貴一人請前往協辦等語著照所請前往阿克蘇協同永貴辦事哈喇沙爾事務著書山辦理定長范時綬仍著駐劄關展承辦一應事務

諭定邊左副將軍成袞扎布酌辦哈薩克使臣來京
上諭軍機大臣曰昨據定長奏稱哈薩克阿布賚之
兄阿布勒瑪木比特遣其子俄羅斯蘇爾統等三
十餘人隨喀喇沁臺站章京納旺前來入覲貢馬
由烏里雅蘇台行走已傳諭納旺令其帶領速行
於上元節前到京如馬力不及亦不必勉強仍傳
諭成袞扎布哈薩克所貢馬匹若隨同行走未免
遲滯著先令使臣馳驛起程將貢馬暫留軍營從

容牽送

乙亥

諭定邊左副將軍成袞扎布酌量賞給追賊官兵

上諭軍機大臣曰福祿奏稱喀爾喀協理一等台吉

鄂木布濟索倫佐領錫爾伯圖等領兵拏獲盜竊

卡倫牲隻賊人滿塔克等應請正法示衆其家口

分賞兵丁等語福祿得親扎卜俱著交部議敘仍

加賞得親扎卜緞六端多爾濟車登達什朋楚克

車都卜鄂木布濟錫爾伯圖等及効力兵丁俱著
分別賞給緞疋銀兩

恩免和托輝特之烏梁海本年未完貢賦

上諭軍機大臣曰據成衮扎布等奏稱和托輝特之
特斯奇木托濟錫爾克騰等四部烏梁海共十六
鄂拓克一千一百餘戶內五百餘戶尚能交納貢
賦餘皆無力現在收取伊等貂鼠狍獐獐狼狐等
皮張及鷗翎麝香等物除麝香不准充貢餘物量

其所值以每戶三貂計算僅得一百七十一戶其
未完之項請於次年帶收等語此等烏梁海受青
滾雜卜擾害生計俱屬艱難著傳諭成衮扎布將
伊等未完貢賦加恩豁免乃令莫尼扎卜曉示伊
等從前何等苦累今為大皇帝臣僕除正供外並
無額外需索現在未交皮張又行寬免嗣後爾等
應納貢賦務如數交收不可有意希恩仍致缺少
莫尼扎卜辦理烏梁海事務頗屬効力著加恩賞

給緞足

丙子

諭叅贊大臣舒赫德等查補調回卡倫兵丁等事宜
上諭軍機大臣曰據舒赫德呈報軍機處因送回納
穆扎爾等家人之便將効力年久之察哈爾佐領
巴雅爾暨兵丁四十四名撤回巴里坤等語察哈
爾兵調往軍營多用於卡倫臺站所關甚要不可
懸缺可傳諭舒赫德清馥此等撤回兵丁有原在

卡倫臺站者自應將新派之察哈爾兵補缺納穆
扎爾等之行裝至巴里坤清馥即給與驛馬由西
安一路來京又所報同行有三等侍衛章武藍翎
侍衛班泰等家人前愛隆阿奏報納穆扎爾三泰
信息祇有侍衛奎瑪岱未及其餘侍衛官員俱著
兆惠舒赫德查明奏請優卹

諭定邊左副將軍成袞扎布等查辦擒獲逃犯及疎
防旋獲之官兵等

上諭軍機大臣曰據扎隆阿查奏擒獲恩克等之烏
梁海章京等或照例賞給緞疋或送部議敘又開
列一等兵丁應賞銀六兩其二等官兵與烏梁海
兵丁等俱毋庸議等語昨伊等奏報獲犯時已諭
將烏梁海兵丁一體賞給著照一等兵丁例賞銀
六兩其二等官兵著賞銀四兩至所奏烏梁海章
京等送部議敘伊等惟圖賞賚何知議敘之榮著
將例賞緞疋茶葉烟草加倍賞給又侍衛喇卜坦

等疎脫克爾齊里克旋行追獲自可功罪相抵喇
卜坦著加恩免其革職所有看守兵丁俱免其革
去名糧照所擬鞭責穿箭遊營以示薄懲

丁丑

諭定邊左副將軍成袞扎布等辦送哈薩克使臣事
宜

上諭軍機大臣曰據成袞扎布等奏稱哈薩克使臣
等行至軍營隨示以車駕今在京師非爾等入覲

之時但業已前來須候請旨到日遵行等語近因
定長等奏哈薩克人等由烏里雅蘇台前來已傳
諭納旺令於上元節左右趲到如不能即從容行
走亦可若以非時相阻則豈有令其空回或令候
至次年抑或此時特為伊等臨幸熱河之理若謂
伊等未經出痘則從前亨集噶爾等尚且奏請來
京此次自當照辦所見殊屬拘泥著遵前旨曉示
或竟告以業經奏請蒙恩念爾等遠來若不令瞻

仰未免有虛誠意況從前使臣等亦未經出痘尚
懇請來京今時值隆冬更自無妨仍計正月十九
日以前能否抵京酌量辦理

戊寅

諭乾清門頭等侍衛官長保等取道解送馬匹

上諭軍機大臣曰據富德奏稱解送馬匹牲隻自己
里坤取道額林哈畢爾噶經過烏魯木齊阿勒輝
伊克朱爾都斯巴哈朱爾都斯海都河喀喇淖爾

庫庫努忒嶺至阿克蘇較之現行臺路既無戈壁
且饒水草但須二月冰雪消化時方可行走查朱
爾都斯等處係達什達瓦舊游牧本年策布登扎
布帶回厄魯特梅楞察罕扣章京帕克巴達什諾
爾布扎卜等三人熟識路徑等語著傳諭官長保
現在派調達什達瓦游牧兵丁富德尚未知悉伊
等熟識路徑者諒不止此三人若三人業已在內
自可毋庸置議即令有別項事故亦不必定派伊

等或不必過巴里坤徑由阿濟必濟前往亦即詢問熟識道路之人伊等此去由巴里坤行走與否酌定取道何處即呈報軍機處以便行文辦理馬匹牲隻之大臣官員併傳諭兆惠富德舒赫德等知之又

諭曰黃廷桂奏詢問侍衛德爾森保據稱額林哈畢爾噶一帶水草甚佳解送阿克蘇馬匹應由此路行走但沿途未免有嗎哈沁西安滿洲兵及達什

達瓦厄魯特等若令亦由此路分起護送更屬妥協等語與富德所奏相符已傳諭官長保及解送馬匹之副都統伊柱富景矣可傳諭黃廷桂俟官長保將應否仍由巴里坤取道之處酌定知會後來年解送馬匹牲隻即照此辦理起程可也

叅贊大臣舒赫德疏奏起程策應日期

舒赫德奏言臣前奏請將愛隆阿所領滿洲索倫蒙古兵丁五百名馬二百餘匹速為飼秣臚

壯并酌量賽里木回人等助出馬匹辦理行裝
策應大兵所調各隊新兵有先到者即帶領進
發今據催督官兵人等報稱察哈爾兵健銳營
頭二起兵十二月初二三必到餘於初六七可
到差往賽里木之人雖未轉回據阿克蘇阿琿
伯克阿奇本伯克鄂對之妻等情願助馬一百
匹城守官員等亦捐助馬駝及存留運米駝騾
臣又於阿克蘇挑選綠旗烏鎗兵五百名照管

礮位兵一百二十名分給官兵一月行糧及飼
馬大麥於本月初四日同愛隆阿巴圖魯侍衛
占頗圖伍岱瑪呼占丕納回人總管噶岱默特
等領兵自阿克蘇起程酌於巴爾楚克留兵防
護臺站其阿克蘇城守有綠旗兵一千餘名令
副將定柱等管領烏什賽里木拜有貝子玉素
富及丑達等分領官兵防守和闐等六城有伯
克鄂對侍衛齊凌扎卜等管理奏入

上諭軍機大臣曰舒赫德奏整頓阿克蘇等處兵馬
策應兆惠軍營回城阿琿伯克及玉素富丑達等
捐助馬駝於本月初四日起程等語辦理殊屬妥
協伊等以忠勇之氣激勵將士軍威遠震內外合
擊倘蒙

上天福佑或可勦賊成功佇聞捷奏阿克蘇之阿琿伯
克及玉素富等捐助馬駝急公可嘉著俱折價賞
給令永貴辦理又據奏稱聞伯克鄂對有從和闐

城派馬步兵一千名預備羊隻糧石之信伊從軍
以來諸事奮勉此次尤徵誠悃著加恩賞給公品
級兆惠舒赫德等即傳諭知之

命於鄂爾多斯等處購辦牛羊

上諭軍機大臣曰現在大兵進剿需用牛羊以資軍
食著乾清門侍衛巴爾品郎中富鼐馳驛前往鄂
爾多斯阿拉善山會同該扎薩克等於伊等牧羣
內牛羊就所有酌量購辦給以官價邇來牲價稍

昂可量為增給就近於寧夏庫貯銀兩內支領所
購牛羊亦著寧夏地方官送交督臣駐劄處所轉
送軍營

庚辰

諭辦理屯田副都統職銜定長曉示哈薩克貿易人
等事宜

上諭軍機大臣曰據定長奏稱哈薩克阿布賚遣布
魯特昆都渾等十餘人前來貿易於十二月初四

日至烏魯木齊已行文舒景阿照例辦理又收到
阿布賚寄努三之書懇賞貿易人等口糧馬匹遣
回游牧等語哈薩克人等貿易特為伊等圖獲利
息情愿前來惟計物償值示以公平並無另為辦
理之法若預備歸途行糧此端斷不可開著傳諭
定長等伊等貿易來人知努三已離烏魯木齊或
不言及此事若仍以阿布賚書信為詞舒景阿即
曉示云我辦理貿易大臣因爾等踰期不來久已

回京理應停止貿易但商貨尚存念爾等遠來空
勞往返故酌量辦理貿易尚屬通融此外事體更
不敢干預且貿易人等非請安進貢可比從前亦
無給與口糧馬匹之例即將伊等遣回

賜侍衛德爾森保什爾瑪海巴圖魯號賞銀一百兩
辛巳

貝子品級伯克霍集斯之子漠咱吧爾入

覲

上御乾清宮受朝漠咱吧爾行三跪九叩首禮畢
賜冠帶

壬午

叅贊大臣舒赫德疏奏兆惠軍營信息

舒赫德奏言十二月初三日有回人托克托默
特自葉爾羌來投臣即行詢問據稱大兵至葉
爾羌波羅泥都自喀什噶爾領馬步五千人來
援霍集占領馬步萬人會合迎戰圍守大兵三

十餘日因聞喀什噶爾所屬英噶薩爾城忽被布魯特搶掠二賊猝謀禦敵是日薄暮將軍領兵縱火奪取賊人營壘二處收帳房六十餘架勦殺看守人衆過半二賊相謂此必將軍與布魯特有約即圍守經年諒難取勝且力亦不支莫若議和或可少圖休息因遣所屬及厄魯特各一人通信將軍拘留不遣以矢射書傳諭云爾兄弟果欲納款必先入覲

大皇帝御前否則不允後二賊亦射書願送口糧撤
圍相見將軍不報從此俱未交鋒又聞軍營脫
出之厄魯特告稱大兵於營地掘得米一百六
十窖收馬千餘匹駝千餘隻波羅泥都因喀什
噶爾告急撤回防禦所留僅二百人臣詢托克
托默特係烏什回人從伯克霍集斯之弟阿卜
都里木駐阿克蘇隨霍集占至葉爾羌阿卜都
里木被拘以伊能相馬見釋有家口在烏什吐

魯番是以來投等語臣詳察回人所告屬實尤
宜亟往應援現駐阿克蘇及新派官兵先至者
計二千二百有奇馬一千二百有奇帶領前進
隨行文續到各隊官兵及富德阿里袞等支領
糧料趲行進發又令總管噶岱默特及阿克蘇
阿琿伯克等將伊等投誠後安居樂業情形及
從賊必被勦滅惟將霍集占等擒獻或自來投
順可保身家繕寫回字文書曉示沿途回衆奏

入

上諭軍機大臣曰舒赫德奏據來投回人告稱將軍
兆惠等攻奪賊人營壘霍集占等喪膽求和兆惠
責令輸誠入覲始准納款等語舉動雄偉甚屬可
嘉著加恩賞給御用朝珠金黃帶荷包此帶可常
時服用額敏和卓伯克霍集斯明瑞溫布由屯各
賞給大小荷包道遠不能多齎賞物特派御前侍
衛安泰前往宣慰并傳諭兆惠等將効力官兵查

明奏請交部議敘至回人所聞脫出厄魯特等傳
說軍營掘得窖糧之語或係伊等揚言或實有其
事亦遇便奏聞

乾隆二十四年春正月甲申

諭大學士管陝甘總督黃廷桂等辦送捐糧回人賞

項

上諭軍機大臣曰據舒赫德奏稱和闐等六城米糧
甚多距葉爾羌亦近將來大兵會合正需接濟若

由內地送銀數萬兩緞數百疋青藍等布數千疋
賞給捐助糧石回人則伊等踴躍急功可省運糧
駝隻之費現在阿里衮親解馬駝請將所有餘駝
留運各城糧石已咨行黃廷桂吳達善定長阿里
衮等語所辦甚屬妥協可傳諭黃廷桂等酌量多
為運送以備賞給

恩免甘肅通省來年地丁錢糧及各屬積年未完借
欠雜項

上諭大學士曰甘肅本年應徵地丁錢糧及歷年積欠銀兩草束等項業經上年屢次加恩豁免但念該省邊地苦寒年來承辦軍需小民急公趨事朕心深為嘉予著再加恩將甘肅通省來年應徵地丁錢糧悉予蠲免該督撫等即行出示徧為曉諭并嚴飭屬員實力奉行副朕格外優恤邊氓至意

又

諭曰甘省遠處邊陲地方寒瘠此歲收成歉薄生計

未免拮据雖邇年辦理軍需毫無派累而一切受
僱輓運罔不踴躍急公民情淳樸深堪軫念業經
疊次加恩將連年正供雜項并歷年積欠帶緩銀
糧草束概予豁免惟昨春曾被偏災之地尚有官
借牛具籽種口糧及積年應交官項為從前恩旨
所未及者若照例徵收無力貧黎仍復艱於輸納
著再加恩將甘省上年曾被偏災及勘不成災各
州縣所有未完籽種糧九萬六千餘石又折給銀

一千餘兩未完口糧四萬四千七百餘石又折給銀五千八百餘兩又各屬被旱及被雹處所內有勘不成災地畝原借籽種糧一萬一千三百餘石又折給銀二千五百餘兩口糧一百餘石又折給銀四千七百餘兩又甘州涼州肅州未完牛價銀一萬一千五百餘兩乾隆二十三年各屬借給牛本糧一萬五千九百餘石銀八千餘兩臯蘭縣借製水車未完銀兩及雍正七年起至乾隆二十二

年止未完牙稅磨課等銀兩普行蠲免其乾隆元
年至二十二年止帶徵民欠未完各官養廉公費
銀三萬九千二百餘兩糧一十二萬三千三百餘
石并雍正十三年未完耗羨銀糧均屬遠年積欠
概予豁除俾免追呼以安耕作至口內之柳林湖
毛目城等處口外之靖逆柳溝赤金瓜州小灣等
處屯田并著一體加恩將本年應分糧石各照交
官之數酌減一半交收俾得均霑渥澤

諭大學士管陝甘總督黃廷桂查奏陝西承辦軍需

州縣應免錢糧

上諭大學士曰年來甘省承辦軍需所有通省正供
疊經寬免其帶緩各正雜錢糧亦已屢次加恩蠲
豁今思陝西與甘肅毗連小民踴躍趨事未沐恩
膏除上年被災各屬已加賑恤外其餘或有承辦
軍需州縣應如何分別加恩著黃廷桂詳悉查明
奏聞候降諭旨

乙酉

命革守備唐國正等職留軍營効力贖罪并察議巴里坤辦事大臣阿里衮等

上諭軍機大臣曰前據富德奏途遇巴里坤大臣辦運伊犁兵丁口糧係陝西騾夫牽送騾頭既多瘦斃而夫役衣裝單薄斷難送到朕以長途運送於夫役全無體恤諭飭行查今據清馥奏稱因巴里坤兵丁不敷差遣添給騾夫銀兩令其送往伊犁

仍委守備唐國正典史王尚潤照看伊等辦理不
善應行叅奏等語唐國正王尚潤俱著革職留軍
營効力贖罪阿里衮清馥辦理亦未妥協併著交
部察議

諭定邊將軍兆惠等查拏厄魯特宰桑瑪里格爾巴
朗

上諭軍機大臣曰從前進剿時逃脫之厄魯特瑪里
格爾巴朗令詢問回人漢咱吧爾據稱見伊隨霍

集占行走等語著傳諭兆惠進勦回人時查拏瑪里格爾巴朗或對陣勦殺則已若業經擒獲即派員解送來京至前在伊犁居住回人及投往回部之厄魯特等反覆可惡將來平定回部即將伊等全行勦滅以示懲創

定邊右副將軍富德遣二等侍衛畢拉爾海署驍騎校五格送來降之厄魯特綽羅斯台吉三濟扎卜來京

授三濟扎卜為三等侍衛在上駟院行走賞衣一襲
其家口留京安插畢拉爾海等俱賞給銀兩馳
驛仍往軍營

叅贊大臣阿桂奏請議敘之厄魯特三等侍衛
卓里克圖巴圖魯碩通至京

命於乾清門行走

大學士管陝甘總督黃廷桂疏奏運送軍需銀
兩羊隻

黃廷桂奏言欽奉

諭旨令臣酌購牛羊辦送軍營查內地之牛不習口
外水土成羣趕解每易倒斃且耕作屆期未免
難於購辦惟各屬羊隻尚可購辦四五萬但時
值騰貴從前定價八錢頗屬不敷懇

恩每隻准給銀一兩則小民均沾實惠此時口外嚴
寒請於來年二月起程庶足接濟軍食又奉

諭旨以回部各城有糧可購哈密等處貯備銀兩宜

寬裕解送臣於十二月初旬因哈密需銀甚多
已飭甘肅道將庫貯銀內動撥二十萬兩送往
哈密即移咨吳達善等酌量寬裕解送阿克蘇
備用奏入得

旨如所議行昨據舒赫德奏籌辦糧石一摺已有旨
諭令覽來奏朕為糧運一事可以稍紓懷矣

丙戌

恩准甘省奏銷僱役價值并免舊欠賠補馬匹

上諭大學士曰從前甘省安臺送兵多僱民間馬騾
用過腳價及到站守候支給草料銀兩該部按例
察核議不准銷但念領價分僱俱屬無力里民且
事在乾隆二十年閱今三載若復按名查追邊氓
力難完繳著加恩將送兵僱價銀三萬八千六百
餘兩支過五日料草銀一萬一千九百餘兩一併
准其報銷其乾隆十九年各標營州縣應賠北口
馬四千六百餘匹自當照數著追第念該省文武

各官此年承辦軍需均能黽勉効力並著格外加恩一體免其賠補副朕獎恤勤勞之意

大學士管陝甘總督黃廷桂疏奏派調綠旗官兵出口日期

黃廷桂奏言臣遵

旨選派進勦兵丁五千名屯田兵一千名及永貴等奏派屯田聽差兵五百名嗣因屯田兵改調進勦隨飭查明補給軍裝器械并咨明吳達善補

給賞項茲據軍需局各道會同肅州鎮呈報所
派督撫提鎮各標副將遊擊都司千把外委等
一百八員帶領兵丁六千五百名於本年十一
月二十九日起至十二月十八日俱先後全數
出關訖奏入報

聞

戊子

命還吐魯番公素賚滿等捐輸馬匹

上諭軍機大臣曰據定長奏稱吐魯番公素賚滿協理伯克木薩呈請捐馬百匹以備軍需等語素賚滿等感激朕恩捐輸馬匹情詞懇切甚屬可嘉但念伊等甫經移駐牲隻諒亦無多仍令存留應用不必竭蹶捐輸至伊等誠心朕已洞鑒可傳諭定長將朕旨明白曉示

諭定邊將軍兆惠等以拉達克所聞回部信息

上諭軍機大臣曰據章嘉胡土克圖等奏稱現在藏

地遣往拉達克探信人等據拉達克汗傳聞將軍
攻取葉爾羌等城霍集占逃往西得沙堪若果來
投必先縛獻且聞大兵將近伊地其情形甚為畏
懼已移文撫慰請諭將軍兆惠加以體恤等語拉
達克距葉爾羌甚遠我兵尚在攻城何由即近伊
地此必我兵平定烏什阿克蘇等城直抵葉爾羌
賊衆驚恐流傳故拉達克亦聞信息耳看來回衆
風聞全無固志尚覺易於辦理將來霍集占若果

潛逃或追至拉達克伊等素稱恭順惟激令擒送
霍集占不可絲毫擾累著傳諭兆惠及章嘉胡士
克圖知之

己丑

命賞給內大臣呼岱巴爾氏捐馬價值

上諭軍機大臣曰據玉素富奏稱伯克霍集斯之妻
及幼丁呼岱巴爾氏等聞進兵策應軍營願捐馬
四十匹以抒誠悃等語霍集斯歸誠以來効力軍

營伊妻子等聞進兵信息亦願捐馬匹協濟進剿
官兵甚屬可嘉可傳諭玉素富每馬一匹賞給銀
十兩就近於闡展阿克蘇支給仍將朕洞鑒伊等
誠悃之處曉示知之

命賞入覲之伯克漢咱吧爾銀三百兩從行之伯克
伯克墨特鄂對色里木達爾罕伯克額穆魯勒
銀各五十兩隨役七人銀各十兩

平定準噶爾方略正編卷六十六

欽定四庫全書

平定準噶爾方略正編卷六十七

乾隆二十四年春正月庚寅

恩諭加增甘省運價辦給營驛糧料各事宜

上諭大學士曰甘省承辦軍需一切糧料草束食物等項採購既多價值未免增長所有額支運腳亦恐不敷前已屢經降旨節次量為增給而肅州安西一帶市集尤為稀少料草辦理為艱宜加渥恩

用昭體恤著將該省運送賑糧兵糧腳價均照輓
運軍糧之例一體增給其肅州安西塘驛應差馬
匹及中路自高臺縣至涇州等二十一州縣北路
自中衛縣至靈州六府廳州縣所管塘驛馬匹俱
暫停折支料草乾銀著照例日給本色以資飼秣
俟軍務告竣仍舊支給折色再涼莊滿營採買糧
料草束及寧夏滿營官員應需粳米並著查明照
依時價採買供支該督撫其妥協經理毋任胥吏

從中侵蝕轉致滋擾

癸巳

宣諭雅爾哈善罪狀即行正法

王公滿漢文武大臣等奏言臣等遵

旨審訊雅爾哈善爾受

皇上重恩身為將軍不能盡力勦賊當逆賊霍集占

敗入庫車時任其脫逃不親身追勦又順德訥

疎脫霍集占之處不早據實情叅奏逐一訊問

據供雅爾哈善受

恩深重當逆賊遁入庫車不能乘機擒獲及順德訥
夜聞賊逃不即追捕即應嚴叅治罪一面領兵
親往追擒乃更隱忍不發及賽里木回人供出
始行叅奏實繫糊塗希圖掩飾罪無可辯臣等
復將伊在軍營種種乖謬貽誤之處逐一嚴訊
雅爾哈善俯首無辭惟稱實無可辯等語查雅
爾哈善奉

命勦賊自應奮勉從事乃進兵之初全無紀律以致
綠旗兵沿途脫逃及病故者無可稽查及至庫
車以八九千官兵圍守一城閱三月之久

皇上天恩未加譴責乃雅爾哈善喪盡天良反示意
順德訥有不論功成與否得一空城亦可報命
之語且惟知安坐營帳並不親行督率巡查雖
據狡供巡查數次而質之侍衛德爾森保則實
止一次至聽信綠旗謬計挖掘地道反為賊所

覺傷損士卒逆賊霍集占等出入庫車毫無知覺及賊首遠遁又不領兵追捕迨來降回人供出知難掩飾始將順德訥叅奏欺罔之罪尤為重大又庫車頭目阿卜都克勒木潛逃所餘老弱出降雅爾哈善猶未入城撫定領兵數月老師糜餉失機債事死不蔽辜應請

旨將雅爾哈善即行正法以昭炯戒奏入

上諭大學士曰雅爾哈善以將軍征討回部乃自進

兵庫車以後種種玩愒乖張失機債事為從前行
師失律諸臣所未有是以將伊拏解來京自軍興
以來問夜旁午事事皆朕親理委曲莫不悉知即
其罪狀昭著亦不待再加鞫訊始抵於法實因伊
貽誤軍國大事欲令大廷廣衆服刑示儆所以彰
國憲而昭炯戒乃朕逐款詰問伊雖一一俯首無
辭而猶然覲面求活竟自舉達爾黨阿哈達哈之
例冀以披甲効力豈知人世間不知羞恥之人竟

有至於如此者試問伊獲罪情節與彼二人同乎
即彼二人之從寬亦出於朕耳豈人臣所可示以
為例乎則知伊之本心原出於怯懦延悞即使獲
罪謂有例可援不失為曾作大臣之人仍然保守
家業妻子耳此其心尚可問乎今據王公大臣等
公同集訊合詞請旨正法使雅爾哈善之罪尚有一
綫可原朕固不因王公大臣等有此陳奏然後
明正典刑似此萬難寬宥之人亦不待衆論僉同

游移從事也且雅爾哈善之老師糜餉安坐縱賊
前後情節俱係伊隨時自行奏報經朕一一親覽
洞燭者其恒怯因循居心欺罔之處實難枚舉毋
論沿途不能約束兵丁任意逃竄及聽信綠旗陋
說輕挖地道傷損弁兵全無馭衆敵愾之道乃至
身任閫師遇事高居簡出對敵則藉稱憑高瞻望
並不親身督戰守壘之兵戒嚴數月亦不親往巡
視及庫車頭目潛遁餘衆出降又不親往經理阿

克蘇回衆輸誠內附並不前往受降迨聞兆惠將至意慮分功始欲進發而卒又不果有一於此尚得謂之有人心者乎然其罪之最不可逭者一在霍集占竄入庫車則姑付之於不知且寬其西逸之路不至追捕又明知順德訥之玩賊養奸而不即叅奏直至賽里木降人供出方以一奏誣罪一在庫車賊黨阿卜都克勒木等尚未盡去即不力督攻取授意順德訥有得一空城亦可報命之語

則又屬何心乎此而不正其罪置國法於何地國
家軍旅重寄凡在臣工無不當奮勇自効大臣中
果有勤勞懋著者朕無不加以殊恩顯秩用示鼓
勵若如雅爾哈善之貽悞至此實出情理之外總
因前此永常榮楞玉保三人以道斃漏網未經解
京明正典刑是以雅爾哈善一無忌憚乃至引達
爾黨阿哈達哈之例以自處則為鼙鼓之說者可
知朕之執法為寬乎為嚴乎雅爾哈善罪案已定

即再加之刑訊亦不過恬不知恥苟延旦夕耳朕
實為衆愧之亦不忍再加刑訊矣著阿蘭泰達青
阿會同法司前往監視將雅爾哈善即行正法夫
信賞必罰乃人主用行政之大權若不謹持成
憲何以整肅軍紀此不得已之苦心王公大臣等
當共體此意者朕亦無可引咎惟增憤懣而已將
此宣諭知之

命賞侍衛德爾森保碩通銀各五十兩達呼里鏘喀

保岱三保銀各三十兩治裝馳驛前往西路軍營

甲午

定邊右副將軍富德疏奏兵抵阿克蘇日期
富德奏言臣於十一月十一日自烏魯木齊起
程十二月十六日至阿克蘇舒赫德努三等於
本月初四日起程相隔不遠臣輕騎晝夜趲行
不過五六日即可追及其解送馬駝口糧等事

飭交副將定柱辦理臣即於十七日起程再臣
隨行之吉林馬甲綽卜泰久在軍前招降右部
哈薩克塔什罕回人等頗屬効力請委署額外
驍騎校遇缺即補奏入報

聞

丙申

諭定邊將軍兆惠等辦理糧餉等事宜

上諭軍機大臣曰據清馥奏稱趕送軍需牛羊較米

麪可省駝隻但滿洲索倫蒙古等習於肉食綠旗
兵則不能至回人米糧若多買則價必昂請於牛
羊外仍將米麪銀兩減半運送等語所奏殊不曉
事昨據舒赫德奏現備米糧牲隻已數萬餘人兩
月之食其陸續趲送之項計可支數月又多運銀
兩緞布向回人購辦斷無不能至六月之理至六
月則自當竣事即再需數日新降各回城種植亦
已成熟足資接濟清馥並不詳籌熟計徒謂糧運

艱難總無善策則一事亦不可行豈有因此撤兵之理似此空言無實轉致搖動衆心有何裨益已傳旨申飭可傳諭兆惠等所有軍營糧餉仍照節次章程酌量辦理並將現在情形作速奏聞又

諭曰清馥奏稱北路喀爾喀蒙古等時將牛羊由游牧送至巴里坤貿易請派大員向喀爾喀及達里剛愛等處採買送往軍營等語軍興以來所購蒙古等牲隻頗多伊等一聞官買即非情願往往藏

匪現在軍營口糧儘足應用所請可不必行或俟
伊等與商民交易再向商民買取則轉運獲利來
者必多陸續解送似尚有益但仍不可明示商民
恐蒙古等妄生疑畏裹足不前可傳諭清馥妥協
辦理再所奏因運送軍需取用商駝二十五隻每
隻折價銀二十兩等語恐未及伊等原值著再加
銀三兩即行支給如已回原籍可行文黃廷桂務
將該商查出補給毋任胥役侵蝕

丁酉

叅贊大臣舒赫德等疏奏和闐等城固守情形
舒赫德等奏言十二月十三日據侍衛齊凌扎
卜噶布舒散秩大臣伯克鄂對等報稱逆賊霍
集占遣賊黨阿卜都克勒木等六百餘人自十
一月二十六日以後往來和闐之額里齊哈喇
哈什等處侵犯城池搶劫村堡現同衆伯克等
悉力拒守擊退賊衆將陣亡得傷官兵職名及

額里齊等六城大小伯克職名戶口糧石牲隻
數目開單呈報臣等移咨齊凌扎卜等令其同
心固守以待援兵嗣後情形即報知阿克蘇辦
事大臣永貴等具奏謹將臣等咨文及原文二
件繕錄進

呈奏入

上諭軍機大臣曰據舒赫德等奏稱侍衛齊凌扎卜
噶布舒散秩大臣伯克鄂對等安撫和闐等六城

擊敗霍集占所遣賊黨等語齊凌扎卜等奮勉効力深屬可嘉伯克鄂對近已加恩賞給公品級著賞銀一百兩仍交部議敘齊凌扎卜賜號穆爾德木圖巴圖魯賞銀一百兩噶布舒賞銀五十兩俱授為二等侍衛陣亡之察哈爾獎賞藍翎侍衛鄂博得傷之索倫署防禦布特木濟馬甲那蘇圖俱著交部照例分別議敘議卹得傷之回兵等著交將軍兆惠酌量賞給以示鼓勵又

諭曰侍衛齊凌扎卜等據伯克阿什默特阿卜都哈
里克等將和闐等六城大小伯克職名戶口糧石
牲隻數目列單呈報誠悃可嘉著賞給伯克等大
荷包各一對阿什默特阿布都哈里克俱著賞給
三品職銜戴孔雀翎其餘伯克等有應賞品級者
著兆惠等查明具奏其防守玉雅勒瑪卡倫之喀
爾喀衮楚克回人伊斯邁拉和卓偵探賊信之索
倫布特木濟領催烏巴什回人愛達爾等亦酌量

賞給鼓勵其回人薩里克聞係霍集占妻父今遣人誘脅額里齊哈喇哈什等城伯克等殊屬可惡併傳諭兆惠等將薩里克務行拏獲解京勿致免脫

命四川總督開泰協辦陝甘事務

上諭大學士曰黃廷桂偶感風寒尚需調治現在軍需緊要著開泰馳驛前往協同辦理俟黃廷桂病體痊愈開泰即由該處仍回四川總督之任

己亥

恩卹故大學士伯陝甘總督黃廷桂

上諭大學士曰大學士伯管陝甘總督黃廷桂忠誠
敏達幹練老成歷任封疆勤勞懋著西陲用兵以
來籌辦軍需備極勞瘁一切規畫機宜動與朕心
膺合數年來轉運糧馬事事精詳妥協毫不累民
內地不知有軍興之費厥功甚鉅倚毗方深是用
疊加寵錫晉爵賜金以彰勞績昨據蔣炳奏伊在

涼州偶感風寒力疾視事舊恙增劇即命福隆安
同御醫馳驛前往診視以冀速痊遽聞溘逝深為
震悼覽其遺疏當彌留之際尚拳拳以西師垂竣
籌辦軍儲為念益見體國奉公赤忱罔斁不知聲
與涕俱難以自禁即著福隆安前往奠醑賞銀一
萬兩交地方官料理喪事並准入祀賢良祠其伯
爵即令伊子承襲所有應得卹典仍著該部察例
具奏又

諭曰故大學士伯總督黃廷桂現已降旨賞賜銀兩
令該省地方官經紀其喪靈柩起程時所過地方
文武員弁俱著出城奠醢并派員沿途加意照料
護送回京

辛丑

授甘肅巡撫吳達善為陝甘總督

上諭大學士曰陝甘總督員缺著吳達善補授甘肅
巡撫員缺著明德補授吳達善未到之前總督印

務即著明德暫行護理

命陞賞護送漠咱帑爾之藍翎侍衛關達色等

上諭軍機大臣曰藍翎侍衛關達色前鋒索諾木扎卜護送漠咱帑爾來京甚屬奮勉著授關達色為三等侍衛索諾木扎卜為藍翎侍衛索諾木扎卜仍賞銀三十兩前往右衛休息數日由彼迎候漠咱帑爾護送回伊所部回京之日賞給官房數間令其居住

壬寅

諭定邊將軍兆惠等通信布魯特事宜

上諭軍機大臣曰據玉素富奏稱遣往布魯特之侍衛布占泰轉回伊於十一月十八日至布魯特邊界之阿特巴什聞逆賊霍集占差人請兵即向車里克齊之子策里木伯特議擒賊黨并派兵協勦據告稱伊等游牧係明伊勒哈辦理及前往曉示又據稱來人已經逃走游牧人少不便調發欲往

瑪木特瑚里處因嶺雪甚大難於行走等語據布
占泰所告是布魯特人等並未出兵前搶掠喀什
噶爾所屬之英噶薩爾城係何處之兵可傳諭兆
惠等訪察遇便奏聞再逆賊霍集占等若尚未擒
獲需布魯特協助即傳旨曉示車里克齊等以霍
集占倘逃至爾處自當縛獻或需爾等協助亦當
乘大兵威勢多所俘獲且可雪前仇車里克齊入
覲遙歸亦諭清馥定長等於巴里坤一路留心傳

旨并將伊等言語若何作速奏聞

癸卯

諭甘肅巡撫明德等解送馬匹事宜

上諭軍機大臣曰吳達善補授總督用明德為甘肅
巡撫自應感激朕恩一切盡心辦理現在軍需孔
亟吳達善尚未到任凡糧餉馬駝器械何一不當
籌畫昨據官長保等奏報選派達什達瓦兵丁五
百名於本月初十日至拜達里克擬由烏里雅蘇

台取道徑往烏魯木齊前抵阿克蘇等語現在涼州解送馬匹俱由巴里坤前往官長保即由哈卜塔克拜塔克前赴巴里坤收領馬匹送至阿克蘇此項馬匹曾派副都統富景伊柱解送伊等亦前往巴里坤候官長保到日會同商辦即行起程俱著傳諭知之

諭陝甘將軍提鎮等奮勉協辦軍需

上諭軍機大臣曰現在進勦葉爾羌糧餉馬匹最關

緊要前經黃廷桂董率綜理不遺餘力籌畫始有成規今印務文明德接管已傳諭令其實心實力遵循妥辦但各該將軍提督總兵等向因黃廷桂調度諸務就緒倘明德接管或稍有因循推諉及各分畛域不能彼此協力襄事則伊等罪由自取恐難曲貸著通行傳諭伊等俱係大員一切軍需經明德督飭辦理者仍如黃廷桂存日共相奮勉以濟軍務毋以玩悞取咎

甲辰

諭派出備勦綠旗官兵駐吐魯番聽調

上諭軍機大臣曰吳達善奏稱現調綠旗兵五千名
俟至吐魯番會同定長等酌議挑選調撥再照例
支給賞銀等語著傳諭定長等此次派出兵丁五
千名專備五月進勦之用伊等暫駐吐魯番聽候
將軍兆惠調撥若派令進勦定長等即照例給賞
起程或軍前不需調用即令其屯田不必照進勦

兵丁之例亦傳諭兆惠知之

諭三等侍衛達爾黨阿等搜捕藏匿賊黨

上諭軍機大臣曰昨命官長保等帶領達什達瓦兵
丁五百名至巴里坤同富景伊柱護送馬匹前往
阿克蘇可傳諭達爾黨阿哈達哈伊等所領西安
滿洲兵二千名亦前往巴里坤會同官長保等行
走計此時阿克蘇前進之兵已抵葉爾羌會合將
軍等擒獲賊首但賊衆敗走必分道逃匿而從逆

之沙喇斯瑪呼斯等或未能盡勦偷越山嶺仍回
舊游牧藏匿致侵擾屯田處所亦未可定達爾黨
阿等當詢問熟識路徑之厄魯特於幽僻可藏之
地俱派兵搜捕遇有賊黨盡行勦除俾地方永遠
寧謐亦傳諭兆惠知之

丙午

哈薩克阿布勒瑪木比特阿布賚等所遣使臣
俄羅斯蘇爾統等來朝

上御正大光明殿俄羅斯蘇爾統等行禮畢

命坐

賜茶是晚於山高水長

賜觀火戲

阿克蘇辦事侍郎永貴等疏奏和闐烏什各城
信息

永貴等奏言十二月二十日侍衛齊凌扎卜噶
布舒納爾布散秩大臣鄂對等報稱自葉爾羌

前來賊黨鄂斯璫塞頗爾等領衆六百於十一月二十六日至哈喇喀什額里齊中間屯駐屢次攻城因兩處騎兵共五十餘名不能互相策應聞賊有往葉爾羌添兵之信請調發騎兵數百名以壯聲援等語臣等行文烏什之貝子玉素富得馬二十匹副將定柱在阿克蘇得馬四十匹尚不敷用擬於哈密續送軍營馬一千餘匹內酌量扣辦將來黃廷桂續辦馬三千匹至

阿克蘇時應請扣留一千匹以備調撥又十二月二十四日阿克蘇伯克博羅特等告稱本月二十日阿克蘇西南之克勒費音被賊掠去四人內一人呼圖魯克得脫識賊人密爾托遜即克勒費音之人從賊往喀什噶爾其母尚居原處擒來詰問據供伊子隨波羅泥都圖取烏什差來探聽等語臣等曉示各城以賊人未知大兵陸續進發妄行生事自可計日勦除一面遠

設卡倫瞭望并行文玉素富預作準備并將密爾托遜之母即行正法奏入

上諭軍機大臣曰永貴等奏稱賊黨鄂斯瑞塞頗爾阻截額里齊哈喇哈什要路請派馬兵數百名協剿又稱波羅泥都有圖取烏什之信等語烏什距阿克蘇頗近駐兵亦少賊人欲圖攻取之言雖未可全信而安撫回衆防守城池自屬要務內地續送馬匹到日自應酌量扣留派兵發往至和闐前

已派兵五百名若尚未起程且先發往烏什或賊人來信係屬虛傳再往和闐防守可也

叅贊大臣阿里衮疏奏自阿克蘇起程日期

阿里衮奏言臣押送馬駝於十二月二十五日至阿克蘇計馬二千匹尚可趲行者一千八百有奇駝七百五十隻可趲行者七百二十隻有奇餘即於阿克蘇牧放備用臣與副都統鄂博什等領兵六百餘名辦給行糧即於二十六日

起程奏入報

聞

丁未

勅諭布魯特車里克齊等協擒逃賊事宜

皇帝勅諭布魯特車里克齊等近據將軍大臣等奏稱差往爾等游牧之侍衛布占泰曾見爾策里木伯特及明伊勒哈等知爾等游牧人少且牧放牲畜又值冬寒雪大不能發兵等語朕洞悉情形已

降旨傳諭爾等以極邊藩部慕義歸誠特欲共享
安樂且將軍大臣此時應已成功爾等派兵與否
無甚關係但逆賊波羅泥都霍集占及附和之回
人厄魯特等為大兵攻勦有逃入爾等游牧者務
將著名首惡查拏縛送即可見感恩効力之忱朕
必重加恩賞又近差往右部哈薩克之章京納旺
等帶領使臣入覲途遇爾布魯特喀喇巴圖等差
往哈薩克之巴爾瑚圖告云厄魯特哈薩克錫喇

挈眷屬二十餘人逃入爾布魯特之薩雅克薩喇
巴噶什鄂拓克等語哈薩克錫喇係負恩背叛之
賊不可寬宥者今逃入爾等游牧似屬實情爾等
自應曉示該鄂拓克人等將逃賊夫婦即行拏送
其屬人不妨存留爾車里克齊等奉到諭旨即酌
量該鄂拓克距爾等游牧遠近或親往查拏或令
其擒送并傳示云若復如前隱匿則將軍大臣等
領兵親往搜捕該鄂拓克必致驚擾惟速為擒送

軍營將軍等奏聞定邀厚賞再我大兵昨進勦逆
回傳聞爾布魯特人等曾搶掠喀什噶爾之英噶
薩爾城波羅泥都轉回救應今爾游牧並無發兵
之說則此舉又係何人我兵正在攻取賊城此等
布魯特發兵搶掠以分賊勢甚屬可嘉朕欲加恩
獎勵爾等亦查明具奏此等布魯特皆爾同類伊
受朕恩爾等亦與有榮施也爾等其據實繕寫奏
章交沿途所遇駐劄大臣即為轉奏特諭又

諭軍機大臣曰勅諭布魯特車里克齊等之旨著傳
諭清馥即轉交車里克齊如有回奏即由臺站馳
遞若伊等業自巴里坤起程清馥處即由臺站速
行馳遞取其回奏轉奏

諭三等侍衛達爾黨阿等辦理續送馬匹

上諭軍機大臣曰據富景等奏稱涼州送馬二萬三
千匹於二月下旬可至巴里坤西安滿洲兵亦於
二月初旬可到等語此項兵丁馬匹全抵巴里坤

後計三月初旬始行進發及至阿克蘇則前進官兵早已會合成功因傳諭兆惠酌量需用與否如不需用即行文知會將兵丁撤回其馬匹留巴里坤牧放可傳諭達爾黨阿等若接到將軍撤兵之信所有官兵即用原來車輛馬匹乘載轉回將趕送馬匹交與清馥令其加意牧放備用不可沿途更換乘騎以致疲乏俱著傳諭知之

叅贊大臣舒赫德等疏奏沿途詢問情形

舒赫德等奏言臣等進兵以來十二月十八日
至巴爾楚克收回索倫兵丁科濶勒岱阿拉善
察罕察哈爾喇什扎卜博爾啟四人據稱隨將
軍納穆扎爾等進兵被傷藏匿尋覓大營不得
沿途再遇賊人十餘同來六人內兩察哈爾被
擒又數次遇見步行之嗎哈沁等語臣等恐係
賊人偵探我兵間之總管噶岱默特據稱霍集
占等將沿途卡倫撤回此等回人皆從前埋藏

糧食遺棄什物者今暫來尋覓耳查兆惠進兵之路水草原屬平常又經踐踏及賊人燒燬臣等沿途詢問嚮導等於二十日渡葉爾羌河二十一日至額爾吉斯距軍營約八九日程期臣愛隆阿曾經行走同噶岱默特為前隊捉生詢問至巴爾楚克係通葉爾羌喀什噶爾總路歧途錯出此外若安設臺站恐被賊搶奪因於相去九十里之亨喇克以五十人設一臺有軍營

要事專差馳送不過五六日可至俟富德前來
應否再行安設酌量辦理奏入

上諭軍機大臣曰舒赫德奏稱路遇隨納穆扎爾進
兵之索倫阿拉善等被傷兵丁覓路轉回殊屬可
憫著將軍大臣等酌量賞給將來我兵會合若擒
獲霍集占等固稱竣事即使渠魁逃遁而回城盡
皆收服亦無難追襲惟一時不能就緒必暫回阿
克蘇則往返有需時日因思和闐各城去葉爾羌

頗近米穀有資且當賊人逃走之路或就近駐劄和闐整頓兵馬再圖大舉似屬長策可傳諭兆惠富德舒赫德等酌量情形會議具奏

諭阿克蘇辦事侍郎永貴賞給兵丁衣履事宜

上諭軍機大臣曰據蔣炳奏稱永貴咨取藍白布各八九千疋及針線等物辦送哈密轉解庫車阿克蘇等處備賞兵丁等語兵丁衣履殘敝官為辦給事理宜然但軍營効力各兵自應一體恩恤若擇

其衣履殘敝者始行賞給即非均平之道或有情願支領於鹽菜銀內坐扣還項尚屬可行惟不可令其現交銀兩可傳諭永貴所辦賞項是否向有成例及作何分賞之處聲明具奏

勅諭巴里坤辦事布政使清馥酌辦哈薩克使臣馬駝

上諭軍機大臣曰據清馥奏稱辦理右部哈薩克使臣起程計駝載賜物衣裝及護送官兵口糧共需

駝九十隻又支給官兵使臣等每人馬二匹共需馬一百三十餘匹等語所辦又屬錯悞哈薩克布魯特人等原有騎來馬駝至巴里坤存留牧養始從臺站更換赴京歸程之時仍應換給伊等乘騎若因其初次入覲酌量添備亦應明白曉示令入伊本境後即為發回何必盡從官辦伊等係極邊藩部惟利是圖若不定以章程則自此來者日多何以供給從前準噶爾來使回巢亦俱送至巴里

坤即更換原來牲隻並無官辦之例況此等請安之微末人等乎清馥特聞知伊等到京後朕加恩宴賚即如此辦理殊屬外任習氣可傳諭清馥曉示哈薩克人等以官辦原無成例特因爾等初次入覲酌量辦給嗣後只於巴里坤更換原來騎馱此項官馬駝至爾等境內時即交護送官兵等帶回仍將如何添辦飭交之處具奏若此時業已辦理起程即著定長照此曉示并飭知護送之侍衛

官員

庚戌

陝甘總督吳達善疏奏自哈密馳回甘肅日期
吳達善奏言正月十八日據布政使蔣炳報知
大學士伯總督黃廷桂於正月十一日病故伏
查現在滿兵陸續出關所調文武各官在甘州
涼州等處飼秣馬匹正需挑驗起解且恐沿途
供給官兵各員或聞督臣之信稍有懈怠臣隨

將哈密事務交五吉辦理即馳回甘肅查辦一切俟新督臣到時仍往哈密辦事奏入得

旨汝此來甚是汝材器聲望實不及黃廷桂但若用新人恐更不如汝熟路也故不得已即用汝為總督汝其勉之但須實心實力效黃廷桂之居心行事或能勝任亦未可知有黃廷桂在實可慰西顧內地之憂一心專辦軍務今將並繫懷甘陝于寤寐也汝知朕一片苦衷感發天良不存顧己之念

或不負任用之意然此際所最要者莫如鎮靜若無事不然屬員見汝底裏稍形竭蹶誤事不淺勉之勉之

辛亥

命喀爾喀親王桑寨多爾濟採買馬駝

上諭軍機大臣曰烏里雅蘇臺軍營馬駝近年需用之處雖較前頗少但該處來往各部落人等甚多且軍營坐卡各差仍需馬駝備用著交桑寨多爾

濟於喀爾喀庫倫地方採買馬匹駝隻約二三千
照依官價給銀由內部撥解

二月壬子朔

諭定邊左副將軍成袞扎布等酌量留撤北路官兵
上諭軍機大臣曰成袞扎布等奏稱北路所有索倫
兵六百餘名察哈爾兵九百餘名請交營總舒都
勒副都統職銜栢起等照例給予口糧陸續遣回
游牧所留滿洲喀爾喀綠旗兵一千三百名以八

百名看守烏里雅蘇台塔米爾倉庫以五百名駐
創布延圖等語北路現在無事兵丁在外年久索
倫察哈爾兵著照所奏撤回游牧布延圖無庸駐
兵五百著留三百看守倉庫其看守烏里雅蘇台
塔米爾倉庫之兵丁八百名著留六百各撤二百
名即同索倫察哈爾兵遣回原處布延圖兵丁亦
係暫駐今歲回部事竣即行撤回

駐劄闡展副都統定長等疏奏移設臺站

定長等奏言去年三月內大兵前進自托克三
取道伊拉里克博爾圖嶺過哈喇沙爾至庫車
安設臺站經兆惠富德等以嶺高雪大地多戈
壁應行移駐咨行又准永貴咨與阿里衮相會
時據稱由素巴什帶領馬駝尚不甚險且有水
草等語臣等即向吐魯番公素賚滿咨取熟識
路徑回人同遊擊達色等查勘得由托克三之
南素巴什一帶共設臺站五處可通特伯勒固

臺站內素巴什庫木什阿哈瑪烏什阿克坦三處尚多水草阿克布拉克一處有駝隻可食之草惟額爾吉齊一處無水因於山中掘得一泉可供臺站人馬之用請將博爾圖嶺阿咱罕布拉克和斯特勒克塔塔爾察罕通曲輝等臺站撤回改駐謹繪圖恭呈

御覽再寧古塔兵丁雅呼係前從準噶爾脫出居住安西之人今帶領哈薩克人等貿易事竣或遣

往軍營或令其進京應請

旨遵行奏入得

旨臺站自應留心查辦雅呼著送京發回原旗

癸丑

諭陝甘總督吳達善等辦送軍營馬匹牲隻事宜

上諭軍機大臣曰據明德奏稱前任督臣黃廷桂奏
明撥解阿克蘇馬一萬六千匹辦給西安滿洲兵
及達什達瓦兵丁馬七千匹送馬大臣官兵乘騎

三百五十匹俱挑選齊全擬交代總督印務後即
馳赴口外嚴加督察又阿拉善郡王羅卜藏多爾
濟捐輸羊五千隻送至鎮番縣業經收領等語又
據巴爾品等奏稱於鄂爾多斯扎薩克購得牛三
千頭羊四萬隻山羊八千隻貝勒齊旺班珠爾等
捐輸牛一千餘頭羊五千餘隻請親身送至寧夏
等語軍營馬匹牲隻所關緊要現在得馬二萬三
千匹牛四千餘頭羊五萬三千餘隻從前黃廷桂

辦解軍需悉心籌畫以故屬員奉法毫無貽誤可
傳諭吳達善等循照成規加意辦理定長永貴等
接辦轉解亦宜一體勤慎郡王羅卜藏多爾濟未
奉購辦之旨即願捐輸羊隻著加恩賞給大緞六
端大荷包一對小荷包六個齊旺班珠爾請將採
買捐輸牲隻親身解送著加恩賞戴三眼翎仍賞
大緞四端伊等捐輸牲隻俱著給與價值至所送
牲隻合之運往口糧及屯田收穫穀石已足數軍

營官兵一歲之用毋庸另行籌辦俱各傳諭知之
命賞給哈薩克使人俄羅斯蘇爾統銀二百兩多遂
巴圖魯阿克塔木伯爾氏巴圖魯銀各一百五十
兩車里克齊等四人銀各一百兩伊氏等十八人
及隨僕三人銀各五十兩

陝甘總督吳達善疏奏哈密防兵懇請留班

吳達善奏言查哈密防兵例係二年一換於四
八月交班今據署總兵素昌阿呈報該防兵等

因四月班期在邇現在大兵進剿及押運屯田
需兵甚多伊等未能効力疆場情願告駐一班
稍抒報効之忱籲請懇切自應俯順兵情准其
留陽如蒙

俞允請照換防之例支給整裝俸賞以示體恤奏入
報

聞

平定準噶爾方略正編卷六十七